

## KOLOSİ DİLAG NAI PAULUS YOM

### *PAULUS NUG KOLOSİ DİLAGNU KAYAK UN- UQITOM*

<sup>1</sup> Da Paulus, da Kristus Jesusnu total danab. Kayak Nug da Jesusnu total danab daakulnu da onilpa eum amu da amu da layal Timotius ele

<sup>2</sup> i udug imu ag Kayaknu danab ah ag apa Kolosi daateb, ag i laintad, ag Kristusnu oolagpa genab dooteb, ahilagnu yaatep. Ig Mamenig Kayak amu Nadi Jesus Kristus ele, ahilah ehanitak okai hamu megtep amu ahilah madod ele ahilagpa daaglahnu oonih daate.

<sup>3-4</sup> Ag Jesusnu oolagpa genab doonna, ag lailkad ag oolagpa genab dooteb ele, amu dilagnu ele oolag mauhte amu i anam doyođa, unuqitak ihinihpa haen oh amu i ihinig Nadi Jesus Kristus Mameg Kayak amegpa ahilagnu, “Ena heme,” aod atep.

<sup>5</sup> Ag tatam Jesusnu Nai Ena doon, keeke Kayak Nug hab atan ahilagnu tituanom amu ag amu aoglagnu ele doona, ag aoglagnu gemu ameg meteb amunu ag oopa genab doyak ahilag amu oo mauhak ahilag ele adan daateb.

<sup>6</sup> Nai Ena amu wan atu ohpa uke, danab ag doonna heeg, nadi ma amu kobol ena, doyak digdig ena ele danab kudum ag aaku aon heteb. Anamib aaku ahilagpa dig meum, ded amupa Nai Ena amu nug he, ag aon, ag Kayaknu ehanitak okai

hamu meḡte ele diig doon, ag kobol ena, dab mak ena ele aḡan oiteb.

<sup>7</sup> Epapras, i lainihnab, nug am Kristusnu uḡat nid ena, ihinih uḡat laipu, nug i ehanita, Kristusnu uḡat amu dab meḡa auta aote ele amu, nug ag Jesusnu Nai Ena amu ipuanate, ag doopig.

<sup>8</sup> Nug ag Kolosi danab ah, ag Kayaknu danab oh dilagnu oolag mauhte, nug amunu i amenihpa a doomuḡ. Kobol amuam Kayak Oudi Nug ag maḡom.

<sup>9</sup> I nai amu doomuḡ, deḡ amupa, i doomuḡ diig amunu i Kayak ag ehanadkunu dig meḡa unuqidḡa daatep. I ahilagnu daunih ii atite. I Kayak ag ehanateb, ag Nug oo aḡem niite amu ag dooglagnu, Kayak Oudi Nug ag doyak ena diigdiig ag mateb, ahilag dab makpa am ba leta nekunu unuqidtep.

<sup>10</sup> Anam dayeb amu ag Naḡinu dab mak dim lamidkulagnu, ag Nug oo niitepa oiglagnu elele daanna, ag uḡat ena diigdiig henana, ag Kayaknu doyak okai ele aoglag.

<sup>11</sup> Ag Kolosi danab ag anam daanna, ag anen anen ag Kayak epegpa uḡat hekulagnu gagatag ena diigdiig aona henana, ug diigdiignu maon, gagatag ahan daanna, oḡaina bitumtum ii gomana. Iiḡa, ag ug amunu geha ag gamalag ahebeb, maoglag.

<sup>12</sup> Ele amu ag ig Mamenig amegpa, “Ena heme,” oo gamag ahak elepa akulag. Nug he, ag keeke oh, Nug ag aoglagnu tituanom amu, aoglagnu elele daateb. Ao geha ag amu Kayaknu danab laa ele ig oh nuhig ḡo maḡoḡ, amahlak ele oopa daateḡ amu ig oh ele aognig.

<sup>13</sup> Nug ig hipuninnu gagatag hipalikak amu

amunu uhuqikom. Nug ig edua awika, nid nuhig Jesus, nuhig do madod oopa daagnignu meikom. Nug Beķanu amu Nug oo huan mauhte.

<sup>14</sup> Nug Beķa Jesus, Nug tiigpa Nug hipunin ihinig uhuqa meķowa amu Nug ig edua awikom.

### *KRISTUSNU KOBOL AMU NUHIG UDAT ELE*

<sup>15</sup> Kayak Beķa Nug am Kayak, danab laa nug Nug anidkunu elele iita, Nug bianab aaku daate. Nug am keeke oh Kayak he beum daate, Nug amunu iki anuqaknab daate.

<sup>16</sup> Ig amuam genab anidkunignu diig am Kayak Beķa Jesus, Nug wan imupan keeke, hab atannu keeke, keeke ig anidtem ii anidtem ele amu, amu oh Nug heum. Amu gumatak aben oh, laa okainab, laa am okai, laa am nakok okai, laala am okaiib amu Nug amu dilag ehah amu aben ele heum. Nug amu oh heum amu ag Nug ehanidkulagnu daateb.

<sup>17</sup> Nug keeke oh ii bepigpa dayom, amu keeke amu oh nuhig gagatagpa daate.

<sup>18</sup> Jesus Kristus Nug am kristen tamaniak iki daate amu kristen tamaniak amu Nug bedu daate. Kristen tamaniak diig amu Nugib aaku. Nug am danab anuqak modpan bau edua hibaitak danab. Nug anam daate amunu keeke oh iki amu Nug aaku daate.

<sup>19</sup> Adinu? Kayak oo niiom bia amu Nug he, Kayak Nug am atemnab daate, nuhigpa adi kobol keeke am bak daate ele, amu oh amu anamib aaku Jesus nuhigpa anam dayom.

<sup>20</sup> Kayak Nug wanpan keeke oh amu hab atannu keeke oh ele amu Nug heeb, ag Nug ele oolag laipu daaglagnu oo dayom. Anam oo dayom amunu

Nug Kristus ad emaitakpa mauhe, tiig gokade, Kristus tiigpa amu Nug nuhiḱud keked oh amu ebehilag okule, madod daate.

<sup>21</sup> Anuka ag Kolosi danab ah ag dab mak ehed aon, kobol nau ele hepig amunu ag Kayaknu keked daapig. Ag Kayak ele ou qak ii daapig, pide laih daapig.

<sup>22</sup> Amge Kristus Nug danab bedu awa, ad emaitakpa mauhom, ib amupa Kayak he, ag Nug noobpa bedulagpa ab iita, opia awak, ehed laa iita ele daaglagnu ag Nug ele oolag laipu daateb.

<sup>23</sup> Ag anam aaku daateb amge ahilag oopa genab doyak amu ag gagatag adan, tudidna, gagatagnab dayeg! Anam ii dayeb amu keeke laa nug ag eedateb, ag Jesusnu Nai Ena doona, oolagpa genab doopig ele amu, ag gagatag amu uuna, ag nena qekulag. Jesusnu Nai Ena amu danab wan ohpa daateb, ag amunu mehuqak doopig. Amu da Paulus, da am nai amunu udat danab daatem.

### *PAULUS NUG KOLOSI ADI ELE EHANATOM*

<sup>24</sup> Amu da gemu bedulpa guitak maotem imu am da amunu gamal ahate. Adinu? Amu da ag ehanadpi, ag ena daaglag. Da Kristusnu kristen tamaniak ehanidkulnu ool daate amu kristen tamaniak am Nug bedu aaku. Guitak Kristus Nug kristen tamaniak ehanidkunu mawom amuam daate amge guitak da daka bedulpa maotem imu am da amupa hei, Kristus Nug guitak mawom amu aaku elele medate.

<sup>25</sup> Kayak nuka Nug da tituanide, da kristen tamaniaknu udat danab, ag ehanadkulnu bemi. Udat dahil amu da Kayaknu Nai Ena oh genab tutuku mehuqkulnu hetem.

<sup>26</sup> Anuka Nai Ena amu danab budub oh amelagpa hanhan lokumak dayom amge gemu Nai Ena amu Kayaknu danab ah, Nug ag amu anidkulagnu oo daye he, amelagpa miag beum.

<sup>27</sup> Lokumak nai amuam enanagnab, danab oh dilagnu. Amu Nug danab ah nuhikud ag amu dooglagnu heum. Nai lokumak amuam iiku. Kristus Nug ag ele daateb amunu ag Nug ameg mena daapeg, Nug ag omalateb gona, Nug ele hab atan ena daaglag.

<sup>28</sup> Ig Kristus nuhigpaib danab oh amelagpa atem. Ig doyak ena diigdiigpa danab oh ipunitak nai amu dab metak nai ele ipuanadpuput, ag dab mena autna aona, ag Kristusnu danab tutuku eledenab bekulagnu hetem.

<sup>29</sup> Diig amunu da dahil gagatag ohpa da udat amu hekulnu hediag okai hetem. Kristus Nug nuka da udat anam hekulnu gagatag amu meda, Nug da tapadilele hetem.

## 2

<sup>1</sup> Da ag Kolosi danab amu Leodisia danab amu danab oh da idul ii anidpig ele amu, da ag imu dooglagnu ool daate. Da Kayak ag ehanadkunu amu da haen oh udat hediag ele hetem.

<sup>2</sup> Da hediag hetem, amu diig am, ahilag oopa genab doyak amu ag oolagpa gagatag beeb, ag aka anen anen ag nug oo mauhak doon oina, ag dab mak genab, ehanitak megte ele amu, dab mak genab amu aon, madod doon daaglagnu hetem. Ag anam hekulag amu ag Kayaknu dab mak lokumak dayom amu ag dooglag. Kayaknu dab mak lokumak dayom am laa iita, Kristus aakuib.

<sup>3</sup> Nuhigpaib doyak ena diigdiig amu dab mak ena ele lokuma dayaya, am ba leta naana daate.

<sup>4</sup> Amu da danab laa nug nuhig nai meu iitapa ag eedadmanu dab mein, da ag amelagpa nai amu maditem.

<sup>5</sup> Da ag ele oh ii daatem amge da dahil dab makpa amu da ag ele oh daatem bia doyeye, da ag udat ena tutuku hena, ag Kristusnu oolagpa genab gagatag dooteb ele amu, da amu oh anidtem amunu da ool gamag ahak dootem.

### *KRISTUS ELE OU QA, BAU DAYAK AWAKNU NAI*

<sup>6</sup> Ag Jesus Kristus, Nug amu ahilag Nadi daakunu ag oolag matulpig amunu ag tudidna, anamib Nug ele dayeg!

<sup>7</sup> Ag nuhigpa ad wanpa gagatag hibaita daate bia gagatag dayeg! Ag nuhigpaib gagatag aweg! Ag Kayak amegpa, “Ena hen mekame,” anana, laa ag Nai Ena ipuanateg, ag oolagpa genab doopig ele amu, ag hepeg, oopa genab doyak amu gagatag dayad!

<sup>8</sup> Ag danab laa nug ag ulah nai, nai meu iita ele amelagpa matia, ham bupualateb, nug waapa daamnanu dab meig! Danab kobol amu heteb ele amu, ag matiak ahilagpa alai adi dilag kobolnu amu wanneru do gagatag iita ele amunu maditeb. Kristusnu amu ag ii maditeb.

<sup>9</sup> Ag amu dab mekulagnu diig amu, Kayak Nug atemnab daate, nuhigpa adi kobol keeke am bak daate ele amu, amu oh Jesus Kristus nuhigpa aaku dayeye, Nug am danab ele dayom.

<sup>10</sup> Nugib do ohnu amu gaga<sup>t</sup>ag ohnu ele iki daate. Nuhigpaib amu Kayak Nug miag ba, ahilagpa am bete.

<sup>11</sup> Ag Nug ele ou qepig, amupa amu ag gada otadak kobolnab amu ag aaku aopig. Keeke amuam gadanignu keeke iita. Iita, ag Kristusnu ehanitakpa amu ag oolag alag, bedunu kobol amu gedidpig. Kristusnu kobol amuam gada otadak kobol meunab daate.

<sup>12</sup> Ag layatak aopig, haen amupa ag Kristus ele laipu ou qena daaeg, ag Nug ele oh laipu modpa boomateg daan, ag Kayak udat he, Jesus edua hibaitom amu oolagpa genab dooteb amunu ag Kristus ele oh laipu mad ate, ag edun hipaidpig daateb.

<sup>13</sup> Anuka amu ag kobol ehed nau diigdiig henana, ag bedunu oo alag kobol amu dim lamitegeg, kobol amu nug ag aqe mauhpig, ag bau ii daapig. Amge Kayak Nug he, ig Kristus ele oh laipu bau daaut, Kayak Nug ig kobol nau hemut amu uhuqa mekom.

<sup>14</sup> Am do nai yak oh am ihinig ib oo ne dayom amge Kayak Nug ib oo nak am lopadom. Do nai nug am ig hetodika hipalikom amge Kayak Nug ihinig ab amu awa, Jesus bedupa ma, Nug ad emaitakpa atula he, ab ihinig oh aaku iita meum.

<sup>15</sup> Nug Satannu iki danab, anuqak danab ele amu Nug gaga<sup>t</sup>ag ahilag adata, ad emaitakpa Nug ag edatowa amu nug danab amelagpa diia, keeke hamu bia hatom.

<sup>16</sup> Kayak Nug anam heum amunu danab laa nug nuhig dab makpanu e lanaknu, le lanaknu amu

ded okai metidnu, kalam baunu metidnu amu metid haknu ele do laala, ag dim lamidk<sub>u</sub>lagnu, ii mema.

<sup>17</sup> Keeke amu oh amu keeke dotog bia, nai ulah hamu dimpa keeke beku amunu gadaib daateb. Amu Kristus Nug am amu oh edatak, Nug genabnab meunab aaku daate.

<sup>18</sup> Danab laa nug danab amelagpaib nug onig qe nete amge oopa nug nuka nuhignu, “Da am danab onil ele,” doote, nug ele engel binalag mete amu nug ag ham bupualateb, ag nob ena Kayak mada<sub>k</sub>unu dab mete ele amu, ag ii aomnanu, danab amubia waapa aib daapig. Danab amubia amu nug tul niiakpa o ib atempa adi keeke antom ele amu nug amunu nai kudum matiaya, nuhig dab mak, Kayak Oudi Nug dab mak nuhig ii gumate ele amu, nuhig dab mak amu he, danab amu nug nuka nuhignu am binag okai ele doote.

<sup>19</sup> Danab amu nug Kristus ele ou qak ii daatep. Jesus Nug ig kristen, ig ikinignab anuqak daate. Iki nug am bedu oh gagatag medata he, bedu nug didipa tuditak ou qak laipu dayaya, ena daate. Bedu nug am Kayaknu gagatagpa amu ba okai mete.

<sup>20</sup> Ag am Kristus ele oh laipu mauhna, ag wanpan do, gagatag iita ele amu, ag uupig dayeb am, adinu gemu ag edun wan danab oiteb bia oiteb? Am adinu ag edun do meu iita amu waapa daateb? Do amuam inam.

<sup>21</sup> “Na amu aib adame, na amu aib lame, na amu epenpa aib laudidme?”

<sup>22</sup> Keeke ag ig ii adamtanu, ii lamatanu, ii laudidmatanu ateb ele amu, keeke amu oh am dimpa iita meku. Do amuam danab dab



makpanuib. Keeke genabnab iita.

<sup>23</sup> Genab, do meu iita kudum, amuam ag metid haknu ateb, ag ig ika ig oninig qeput nekunu ateb amu ag ig bedunig ele guitak metagnignu ateb amu, ag neekak hamupa amu ena bia daateb amge anamnab iita. Ig dootem, danabnu dab makpanu do laa nug ig ehanikeb, bedunu oo alag kobol, bedunigpa eedigte amu, ig do amupa qeput nokunu elele iita.

### 3

#### *OPIA AWAK DAYAKNU IPU*

<sup>1</sup> Kayak Nug he, ag Kristus ele oh edun hipaidpig amunu ag keeke atannu, aben amupa Kristus Nug Kayak epeg nadiappa, amuam anuqak aben, amupa daate ele amu, ag keeke amuib aoglagnu dab menana oiyeg!

<sup>2</sup> Ag hanhan keeke atan amunuib dab mak aweg! Wanpanu keeke amu ag amunu dab mak aib aopig.

<sup>3</sup> Adinu? Ag oolagpa genab doopig, haen amupa ag wan imupan oiyak am uuna, gemu ag Kristusnu udatpa bauklel aoeg, Kristus ele Kayak amegpa daateb.

<sup>4</sup> Amu Kristus, Nug am ihinig bauklel diig, Nug miag atiebeb, ag Nug ele onilag okai ele miag atiak bekulag.

<sup>5</sup> Amunu ag wan imunu kobol, kobol amu ag, ag oolagpa udat henana daateb ele amu, ag kobol amu oh aqapeg iita meig! Amu da kobol imunu atem, gapai kobol, kobol dubutid laala, kobol naunu oo ahe itag doyak, danab laanu keeke ameg

qak kobol. Keeke ameg qak kobol am kayak genab iita dim lamitak kobol laa aaku.

<sup>6</sup> Danab ag kobol amu dim lamidnana, Kayak ode ii dim lamidteb ele amu, diig amunu hipuninnu bu aqak, Kayak epegpanu udite amu, nug ahilagpa nete.

<sup>7</sup> Anuka ag Kolosi danab ag ele danab amunu oolagpa nona oinna amu ag kobol amu hedapig

<sup>8</sup> amge ag Jesus ele bau hipaidpig, ag kobol amu oh uupig amunu gemu ag kobol nau imu, nai hak, opodi bak, opodi be amya oiyak, dimug nai anak, nai nau matiak ele, ag kobol amu oh ele agapeg ukeg!

<sup>9</sup> Amu ag lailkad aib bupualadpig. Adinu? Ag oolag alagnu kobol oh am uuna,

<sup>10</sup> ag danab bau bepig daateb. Amu Kayak Nug danab bau amu heum. Amu Nug ag hanhan doyak madata he, ag bau bena, Nug biaib daateb.

<sup>11</sup> Amunu kobol bau amupa, Juda danab amu iita adi danab, gada otadpig, gada ii otadpig, Rom danab, Rom danab iita amu begbeg danab, begbeg danab iita, amu oh am keeke hamu, huu anen anen dayak amubia ii daate. Iita. Kristus Nug nuka ag ikilag daate amu Kristus Nug nuka nuhikud danab idu idu ohnu oolagpa noum daate.

<sup>12</sup> Amu ag am Kayaknu danab, Nug ahilagnu oo mauhe, ag tituanatom daateb amunu ag kobol imu aweg! Ag laa dilagnu oo gai iita doonna, ehanateg! Amu ag aka ag onilag qepeg neeb, ag lailkad dilagpa kobol ena heig! Ag madod daanna, danab laa ahilagpa ehed hepeg amu ag oolagpa madodib doona, ug amu maweg!

<sup>13</sup> Ag nug oo makpa daanna, amu ag oolagpa

lailag laa nug layagnu ehed heeb amu layag amu nug ehed hak amu, Nadi Nug ihinig ehed hak oh amu uhuqa mekom, amubia nug uhuqa metad!

<sup>14</sup> Oo mauhak kobol nug kobol laa oh edatom, nug keeke ohnu laipunab tamanite amunu ag ele laa dilagnu oolag mauhad!

<sup>15</sup> Kayak Nug ag tamaniak laipu madod ele daaglagnu ag onilagpa eum amunu Kristusnu madod, Nug ig megte ele amu, madod amu nug hanhan ag oolag gumebeb oiyeg! Amu ag hanhan Kayak amegpa, “Ena hen megtem,” aon aig!

<sup>16</sup> Ag hepeg, Kristusnu nai enanag meu ele amu, ag oolagpa dayad! Ag aka aka doyak elepa nug ipunidnana, nug ehanitak ele heig! Ag Sam amu Metid ahi amu Kayak binag mak ahi ele eteg! Ag oolag gamag ahebeb, Kayak noobpa ahi etaglag.

<sup>17</sup> Ag nai maditebtai o iita ag udat hetebtai, ag adi keeke heteb amu ag Jesus onigpa Mame Kayak amegpa, “Ena hen mekame,” anana, ag keeke amu oh Nadi Jesus onigpaib heig!

### *EWAU AMU NID NAUNAU ELE, AG ATEM DAAGLAG*

<sup>18</sup> Amu ah ag Nadi Nug oo niite amubia ag gamulkad waalagpa dayeg!

<sup>19</sup> Amu ah gamulkad ag, ag waalkad dilag oolag mauhad! Ag aib gagatag hadapig.

<sup>20</sup> Amu nid naunau ag keeke ohpa ag anilkad mamelkad odelag dim lamiteg! Adinu? Nadi Nug kobol anamnu oo enaib doote.

<sup>21</sup> Amu nid naunau mamelkad, ag nid ahilkad ag kobol ena dim lamidkulagnu, bahi yak doomnanu, ag opodilag ele bemanu amu ag tolitak tutukuib mateg!

***BEGBEG AM GUMAK DANAB ELE DILAG NAI***

<sup>22</sup> Begbeg danab ag ahilkad okai keeke ohnu waalagpa dayeg! Ag okai ahilkad amelagpaib ag oolag itag aqakunuib aib hepig. Ag oolag aditpa udat aib hepig. Iita! Ag Kayaknu enanag doon, ag oolag ele otaiebeb, ag udat tutukupaib heig!

<sup>23</sup> Keeke oh ag heteb amu ag hekulagnu ag oolag metan heig! Amu ag, “Ig danabnu udat hetem,” doonna aib hepig. Iita. Ag, “Ig Nadinu udat hetem,” doonna heig!

<sup>24</sup> Adinu? Ag dooteb, buti adi Nadi Nug nob ena, Nug danab ah nuhikud, ahilagnu matu babaitom daate ele amu, Nug ag madaku. Ag am Kristusnu udat nid, Nug am ahilag Nadi daate.

<sup>25</sup> Amu danab nug ehed heum, nug geha ehed heumnu nob aoku. Amu Kayak Nug danab oh melemel laipupaib epediadku.

**4**

<sup>1</sup> Gumak danab ag ele ahilag Nadi, Nug hab atan daate ele amu, ag Nug waapa daateb amunu ag amu dab menana, ag begbeg ahilkad dilagpa kobol ena tutukuib heig!

***GAGATAG UNUQITAK KOBOL AMU TUTUKU OIYAK KOBOL ELE***

<sup>2</sup> Amu ag oh ag Kolosi daateb amu, ag unuqitak kobol gagatag adan unuqidnana, dab mena autna aonna, Kayak amegpa, “Ena hen mekame,” ele aon aig!

<sup>3</sup> Ag ihinignu ele, ig Kayaknu dab mak Kristusnu, tatam lokumak dayom, ig nai amu mehuqkunignu amu ag Kayak Nug ib babaita

megakunu unuqiteg! Da nai amu mehuqmi amunu da mani guitakpa daatem.

<sup>4</sup> Da Kristusnu nai miagib mehuqkulnu amu ag amunu ele unuqiteg! Adinu? Kayak Nug udat amu da hekulu medom.

<sup>5</sup> Danab ag nai enanu oolagpa genab ii dooteb ele, ag Kolosi danab ag danab amu oolagpa oinna, ag aka ahilag oiyaknu dab mena autna aonna, udat heig! Ag haen ahilag hamu aib kakidpig.

<sup>6</sup> Ahilag nai matiak amu hanhan enanag amu doyaknu itag ele matieg! Ag danab oh dilag od mak oolagpa daate amu ag nob mekulagnu elele dab menan dayeg!

### *PAULUS KOLOSI TAMANIAK DILAG HUMITAK NAI ME UKOM*

<sup>7</sup> Ig lainignab Tikikas, nug geha da udat hetem ele imu ohnu matieb, ag dooglag. Nug am ig ele udat laipu, nug Nadinu udat nid enanag.

<sup>8</sup> Nug uka, ag amelagpa ab, ag ig atem daatem dooglagnu, nug ag oolag gagatag qedakunu ele, diig adit amunu amu da mei gotē.

<sup>9</sup> Amu da hei, Onisimas Tikikas ele oh gotep. Onisimas nug ele am ig lainignab, nug ele am Nadinu udat nid ena amu nug am ag ele ab laipupanu. Danab adit amu a geha adi keeke oh ipa ihinignu bete ele amu, a amunu matiglah.

<sup>10</sup> Aristakus, nug da ele oh mani guitakpa daatep amu Makus ele a ag humadtep. Makus, nug Nabas ele a tilah laipu amu, ag nuhignu matiak aopig, nug ag gumata ukeb amu ag nug aweg!

<sup>11</sup> Josua, onig laa Jastas, nug ele ag humadte. Juda danab oolagpanu danab ewam amu aakuib

ag Rom ipa da ele Kayaknu do madodnu udat laipu hetem. Ahilagpa da oo madod ele dayak aotem.

<sup>12</sup> Epapras, ahilag nid laa, Kristus Jesusnu udat danab, nug ele ag humadte. Haen oh nug nuhig unuqitak gagatagpa nug ag ehanatata, Nug Kayak heeb, ag Kayak oo niite ele amu pehetan doon, anamib gagatag daanna, danab kalulag ele daanna, ag dab mak adit ele iita daaglagnu unuqidte.

<sup>13</sup> Nug ag Kolosi daateb amu Leodisia danab ah amu Hiralpolis daateb ele, ahilagnu ehanatak udat okainab hete amu, da amu doyeye madikulnu elele.

<sup>14</sup> Lukas, ig lainignab, nug dokta, nug Dimas ele a ele ag humadtep.

<sup>15</sup> Amu ag dahil humitak ig lainkad laa Leodesia daateb ele amu ag mateg! Laa ele, ag dahil humitak Nimpas amu kristen tamaniak nug laugpa qag meteb ele, ag mateg!

<sup>16</sup> Ag udug imu eb gewona amu mepeg ukeb, Leodisia kristen tamaniak ele eb qeig! Aria udug Leodisia dilag yaami amu ag Kolosi daateb amu ag amu ele eb qeig!

<sup>17</sup> Aria ag Akipas amegpa, “Na udat Nadi epegpanu aome amu na udat amu hepe gogpa tad!” aon apeg doyaq!

<sup>18</sup> Da Paulus, da daka humatak nai ahilagnu iiku yaatem. Da mani guitakpa daatem amunu Kayak dahilnu unuqidkulagnu aib daulag atiom. Kayaknu ehanitak okai Nug hamu megte ele amu ahilagpa dayad!

**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 28 Dec 2024 from source files dated 31 Aug 2023

ed374bb9-d819-53d1-a85b-f86cce3892e1